

**Forum anjuran PasMa diteruskan malam ini, medan jelaskan serangan PAS**  
**Malaysian Insider**  
**Sept 8, 2014**  
**OLEH JAMILAH KAMARUDIN**

Persatuan Ummah Sejahtera Malaysia (PasMa) akan meneruskan forum "PAS campur Umno: Ke Mana Hala Tuju" malam ini di Dewan Perhimpunan Cina Kuala Lumpur Selangor (KLSCAH) di Kuala Lumpur, walaupun 2 ahli panel asalnya menarik diri.

Setiausaha PasMa Mohd Taib Ahmad berkata berikutan kenyataan Naib Presiden PAS Datuk Tuan Ibrahim Tuan Man yang menyerang badan bukan kerajaan (NGO) itu, pihaknya akan menjelaskan fungsi dan barisan kepimpinannya kepada umum.

"PasMa juga akan menjawab semua tohmahan dan laporan songsang berkenaan badan ini," katanya dalam satu kenyataan hari ini.

Forum itu pada awalnya dijadualkan menampilkan 3 ahli panel daripada pemimpin tertinggi PAS, iaitu bekas Ahli Majlis Syura PAS Ahmad Awang, Naib Presiden PAS Datuk Husam Musa dan Ahli Jawatankuasa (AJK) PAS Pusat Datuk Dr Mujahid Yusof Rawa.

Bagaimanapun semalam dilaporkan PasMa berhasrat mahu menanggungkan majlis itu ekoran 2 daripada ahli panelnya tarik diri pada saat akhir.

Mohd Taib ketika dihubungi berkata, Husam menarik diri pada saat akhir tanpa memberikan sebarang alasan, manakala Ahmad berada di luar negara.

"Kita akan teruskan forum. Mereka akan digantikan dengan Presiden PasMa Datuk Phahrolrazi Zawawi dan seorang ahli akademik.

"Manakala Mujahid akan hadir sebagai ahli panel," katanya kepada The Malaysian Insider.

Tuan Ibrahim semalam melarang ahlinya menyertai PasMa atas alasan dalam PAS itu sendiri sudah mempunyai lajnah kebajikan.

"Kita teliti NGO tersebut dan setakat ini kita tahu pendaftaran adalah bagi tujuan kebajikan bukan parti politik.

"Tetapi tidak ada keperluan ahli PAS untuk sertai PasMa kerana kita sendiri pun ada lajnah kebajikan sendiri," katanya kepada pemberita selepas program Ijtimak PAS Selangor 2014 di Serdang Selangor.

Beliau juga menolak persepsi PasMa dilihat sebagai alternatif PAS dalam Pakatan Rakyat (PR).

Katanya isu alternatif tersebut bukan perkara baru dalam sejarah parti Islam seperti Barisan Jemaah Islamiah Semalaysia (Berjasa) dan Parti Hizbul Muslimin Malaysia (Hamim).

"Tidak mungkin, isu ini bukan perkara baru dulu pun ada isu penubuhan Berjasa dan Hamim. Ini kerana PasMa mendapat liputan meluas sebab itu ia tersebar dengan cepat," katanya.

Katanya, PasMa juga tidak akan mampu bertahan lama jika penubuhannya kononnya dapat menggantikan peranan PAS dalam PR.

"Kalau kata hendak tubuh parti sebab tidak puas hati dengan satu isu saya fikir parti itu tidak akan jadi progresif, parti perlu ada satu agenda besar.

"Meskipun itu hak mereka namun Malaysia berasaskan sistem 2 parti daripada segi ruang politik susah hendak bertahan dan saya yakin ahli PAS tetap istiqamah dengan perjuangan parti ini," katanya. – 8 September, 2014.

Hakcipta © 2013 The Malaysian Insider

Source:

<http://www.themalaysianinsider.com/bahasa/article/forum-anjuran-pasma-diteruskan-malam-ini-medan-jelaskan-serangan-pas>